



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 8

Yangia anidakangma : Tir Yimiyim

tiryimiyim@aolima

tir yimiyim

TAPAK 7

Season tembangba sülen Jordi Alba-i Barcelona toktsütsü

Imran Khan'er party nokdangtsü asadangdar: Defence minister



VOL. XX NO. 222 (ADOK 222)

DIMAPUR YANGTEPNÜ (THURSDAY)

MONUPII (MAY) 25, 2023

₹ 5.00

NBSE-i HSLC & HSSLC 2023 results metetdaksüogo; Tetsürtemi takok tajungba angu

Kohima, May 24, 2023 (TYO): Nagaland Board of School Education (NBSE)-i Bodbarnü 2023 indang High School Leaving Certificate aser Higher Secondary School Leaving Certificate

titatidang results metetdaksüogo. HSLC Examination 2023 nung kaketshir 24,361 aser HSSLC nung kaketshir 16,085 liasü ta NBSE Chairperson Asano Sekhose-i ashi.

HSLC nung kaketshir 17,130-i takok angu aser iba ya 2022 küm takok angur 64.69% dang nungi teimba (70.32%) lir ta lai ashi.

Taküm tatidang nung tebur (7780) dang nungi tetsür kaketshirtemi (9350) takok tajungba angu. Maneni top 20 list nung tebur 33 aser tetsür 66 lir, ta Asano-isa ashi.

Taküm tatidang nung sorkar school 24 nung nil pass percentage liasü.

District sasep nung sorkar school temi takok tajung angubaji Kohima district (73%) mezüing, parnok sülen Mokokchung (70%) aser Phek (63%) lir. Teküpoktiba jenjangji Shamator district 6% lir.

Külen, nija school telemsa nung Noklak district (pass percentage 97%) tematiba lir aser parnok sülen Kohima (94%) lir ta NBSE Chairperson-i metetdaksü.

Special Needs kaketshir 26-i tatidang mapang extra time, scribe, exemption of examination fees, use of laptop amala teyari agia liasü aser parnok 17-i takok ngutetogo, ta laisa ashi.

HSLC tatidang nung Don Bosco Higher Secondary School (HSS), Dimapur nungi Christy Paul Mathew (594 total marks)-i tematiba jenjang takok angu. Pa sülen Ram Janaki HSS, Dimapur nungi Arti Kumari (591)-i tanabuba jenjang aser Little Flower School, Chumukedima nungi Sneha Das (590)-i tasembuba jenjang takok angu.

HSSLC tatidang nung Arts stream kübok reju 15, Science stream kübok reju 5 aser Commerce stream kübok reju 4-i 100% pass result nguogo.

Arts nung 82.62%, Commerce nung 85.83% aser Science nung 86.79% pass percentage lir.

Town HSS, Mokokchung nungi Moanola Longchar-i Arts stream nung tematiba jenjang takok angu. Lai 486 marks nguteta 97.20% angu.

Arts stream nung Little Star HSS, Dimapur nungi Nonya Konyak (485)-i tanabuba aser Christian HSS, Dimapur nungi Bodeno Chüsi (483)-i tanabuba jenjang takoktem nguogo.

HSSLC Arts tatidang indang merit list nung sorkar school

nungi kaketshir 2 dena lir. Top 9 nung Government HSS, Tuli nungi Kilenkala (94.20% marks) aser top 10 nung Government HSS, Jalukie nungi Kikogwamle (94.20%) na lir.

HSSLC tatidang nung Children with Special Needs (CWSN) 13-i concessions meshia liasü aser parnok 11-i takok nguogo.

HSSLC commerce stream nung Christian HSS, Dimapur nungi Zahid Ahmed Laskar (99.20%)-i tematiba jenjang takok angu. Maneni, Christian HSS, Dimapur nungisa Fiza Khanom Barbhuiya (494)-i tanabuba aser Pranab Vidyapith HSS, Dimapur nungi Manashmi Ghosh (493)-i tasembuba jenjang takoktem angu.

Science stream nung St. John Higher Secondary Residential School, Dimapur nungi dang kaketshir aseme tematiba jenjang takoktem nguogo.

Awang P Yimpushü (97%)-i tematiba jenjang, Nilovito H Shikhu (95.80%)-i tanabuba aser Wonchilo T Khuvung (95%)-i tasembuba jenjang takoktem angu.

NAGALAND BOARD OF SCHOOL EDUCATION, KOHIMA "HIGH SCHOOL LEAVING CERTIFICATE EXAMINATION, 2023" List of successful candidates holding the first ten position (in order of merit)					
POSITION	NAME OF CANDIDATE AND SCHOOL	ROLL NO.	TOTAL MARKS	WAE & PHE	PERCENTAGE
1.	CHRISTY PAUL MATHEW Don Bosco Hr.Sec. School, Dimapur	231802110	594	AA	99.00%
2.	ARTI KUMARI Ram Janaki Hr.Sec.School, Dimapur	231809274	591	AA	98.50%
3.	SNEHA DAS Little Flower School, Chumukedima	231843245	590	AA	98.33%
4.	ROSHNI GUPTA S.D.Jain Hr.Sec.School, Dimapur	231804165	589	A A	98.17%
5.	(a) SUPRIYA SAHA Pranab Vidyapith Hr.Sec. School, Dimapur (b) AWANTIKA KUMARI Christian Hr.Sec.School, Dimapur (c) AMIT YADAV Ram Janaki Hr.Sec.School, Dimapur	231802089	588	A A	98.00%
6.	(a) KHOTOLÜ CÜRHA Mezhür Hr.Sec.School,Kohima (b) THSATANGPASANGTAM Loyola Hr.Sec.School,Kiphire (c) SHREYANSH CHOWDHURY Vidhya Bhawan Hr.Sec.School, Dimapur (d) ALOK KUMAR DAS Ram Janaki Hr.Sec.School, Dimapur	231103140	587	AA	97.83%
7.	(a) NEISEINUO SUOHU Don Bosco Hr.Sec.School, Kohima (b) METSILU SWIHO St.Mary'sCathedral Hr.Sec.School, Kohima (c) LISHEN MENHAHU Carmel Hr. Sec. School, Chekiye Village (d) NANDINI DAS Pranab Vidyapith Hr.Sec.School, Dimapur (e) ASNEHA KUMARI St.Paul Hr.Sec.School,Dimapur	231105148	586	AA	97.67%
8.	(a) ROHIT KUMAR GUPTA Model Hr.Sec.School,Kohima (b) THIEMBOI CHONGLOI Little Flower School, Chumukedima (c) KHAMAINDI KHEMPRAI St.Mary's Hr.Sec.School, Padampukhuri (d) LUMZILA I SANGTAM St.Paul Hr.Sec.School, Dimapur	231849104	586	AA	97.67%
9.	(a) VIPHREZO VÜPRÜ Mezhür Hr.Sec.School, Kohima (b) TOINO ACHUMI Fernwood School,Kohima (c) AROLÜ PHESAO The Vineyard, Kohima (d) S IMDAN MOILI PHOM Christian Standard Hr.Sec. School, Changtongya (e) ALOKITHE H KIHO Greenwood School,Dimapur (f) PRANAB DEY Pranab Vidyapith Hr.Sec. School, Dimapur (g) AAYUSHI SINGH St.Paul Hr.Sec.School, Dimapur	231802060	586	AA	97.67%
10.	(a) LEVI VILI JOHN Northfield,Khikha (b) KEKHRESINUO SEKHOSE Mezhür Hr.Sec.School,Kohima (c) ANGEL RAIKHAN Mount Hermon Hr.Sec.School,Kohima (d) ANEIDI SANO Baptist Mission School,Jotsoma (e) ALIU T St.John's Hr.Sec. School,Tuensang (f) RAJNANDINI SAHA PranabVidyapith Hr.Sec.School,Dimapur (g)MULUNGSULA CHANGKIRI HolyCross Hr.Sec.School, Dimapur	231104085	585	AA	97.50%
	(b) THIEMBOI CHONGLOI Little Flower School, Chumukedima (c) KHAMAINDI KHEMPRAI St.Mary's Hr.Sec.School, Padampukhuri (d) LUMZILA I SANGTAM St.Paul Hr.Sec.School, Dimapur	231843247	585	AA	97.50%
	(a) VIPHREZO VÜPRÜ Mezhür Hr.Sec.School, Kohima (b) TOINO ACHUMI Fernwood School,Kohima (c) AROLÜ PHESAO The Vineyard, Kohima (d) S IMDAN MOILI PHOM Christian Standard Hr.Sec. School, Changtongya (e) ALOKITHE H KIHO Greenwood School,Dimapur (f) PRANAB DEY Pranab Vidyapith Hr.Sec. School, Dimapur (g) AAYUSHI SINGH St.Paul Hr.Sec.School, Dimapur	231816116	585	AA	97.50%
	(a) LEVI VILI JOHN Northfield,Khikha (b) KEKHRESINUO SEKHOSE Mezhür Hr.Sec.School,Kohima (c) ANGEL RAIKHAN Mount Hermon Hr.Sec.School,Kohima (d) ANEIDI SANO Baptist Mission School,Jotsoma (e) ALIU T St.John's Hr.Sec. School,Tuensang (f) RAJNANDINI SAHA PranabVidyapith Hr.Sec.School,Dimapur (g)MULUNGSULA CHANGKIRI HolyCross Hr.Sec.School, Dimapur	231103110	584	AA	97.33%
	(a) LEVI VILI JOHN Northfield,Khikha (b) KEKHRESINUO SEKHOSE Mezhür Hr.Sec.School,Kohima (c) ANGEL RAIKHAN Mount Hermon Hr.Sec.School,Kohima (d) ANEIDI SANO Baptist Mission School,Jotsoma (e) ALIU T St.John's Hr.Sec. School,Tuensang (f) RAJNANDINI SAHA PranabVidyapith Hr.Sec.School,Dimapur (g)MULUNGSULA CHANGKIRI HolyCross Hr.Sec.School, Dimapur	231104168	584	AA	97.33%
	(a) LEVI VILI JOHN Northfield,Khikha (b) KEKHRESINUO SEKHOSE Mezhür Hr.Sec.School,Kohima (c) ANGEL RAIKHAN Mount Hermon Hr.Sec.School,Kohima (d) ANEIDI SANO Baptist Mission School,Jotsoma (e) ALIU T St.John's Hr.Sec. School,Tuensang (f) RAJNANDINI SAHA PranabVidyapith Hr.Sec.School,Dimapur (g)MULUNGSULA CHANGKIRI HolyCross Hr.Sec.School, Dimapur	231107343	584	AA	97.33%
	(a) LEVI VILI JOHN Northfield,Khikha (b) KEKHRESINUO SEKHOSE Mezhür Hr.Sec.School,Kohima (c) ANGEL RAIKHAN Mount Hermon Hr.Sec.School,Kohima (d) ANEIDI SANO Baptist Mission School,Jotsoma (e) ALIU T St.John's Hr.Sec. School,Tuensang (f) RAJNANDINI SAHA PranabVidyapith Hr.Sec.School,Dimapur (g)MULUNGSULA CHANGKIRI HolyCross Hr.Sec.School, Dimapur	231207052	584	AA	97.33%
	(a) LEVI VILI JOHN Northfield,Khikha (b) KEKHRESINUO SEKHOSE Mezhür Hr.Sec.School,Kohima (c) ANGEL RAIKHAN Mount Hermon Hr.Sec.School,Kohima (d) ANEIDI SANO Baptist Mission School,Jotsoma (e) ALIU T St.John's Hr.Sec. School,Tuensang (f) RAJNANDINI SAHA PranabVidyapith Hr.Sec.School,Dimapur (g)MULUNGSULA CHANGKIRI HolyCross Hr.Sec.School, Dimapur	231813003	584	AA	97.33%
	(a) LEVI VILI JOHN Northfield,Khikha (b) KEKHRESINUO SEKHOSE Mezhür Hr.Sec.School,Kohima (c) ANGEL RAIKHAN Mount Hermon Hr.Sec.School,Kohima (d) ANEIDI SANO Baptist Mission School,Jotsoma (e) ALIU T St.John's Hr.Sec. School,Tuensang (f) RAJNANDINI SAHA PranabVidyapith Hr.Sec.School,Dimapur (g)MULUNGSULA CHANGKIRI HolyCross Hr.Sec.School, Dimapur	231802024	584	AA	97.33%
	(a) LEVI VILI JOHN Northfield,Khikha (b) KEKHRESINUO SEKHOSE Mezhür Hr.Sec.School,Kohima (c) ANGEL RAIKHAN Mount Hermon Hr.Sec.School,Kohima (d) ANEIDI SANO Baptist Mission School,Jotsoma (e) ALIU T St.John's Hr.Sec. School,Tuensang (f) RAJNANDINI SAHA PranabVidyapith Hr.Sec.School,Dimapur (g)MULUNGSULA CHANGKIRI HolyCross Hr.Sec.School, Dimapur	231808046	584	AA	97.33%
	(a) LEVI VILI JOHN Northfield,Khikha (b) KEKHRESINUO SEKHOSE Mezhür Hr.Sec.School,Kohima (c) ANGEL RAIKHAN Mount Hermon Hr.Sec.School,Kohima (d) ANEIDI SANO Baptist Mission School,Jotsoma (e) ALIU T St.John's Hr.Sec. School,Tuensang (f) RAJNANDINI SAHA PranabVidyapith Hr.Sec.School,Dimapur (g)MULUNGSULA CHANGKIRI HolyCross Hr.Sec.School, Dimapur	231101141	583	AA	97.17%
	(a) LEVI VILI JOHN Northfield,Khikha (b) KEKHRESINUO SEKHOSE Mezhür Hr.Sec.School,Kohima (c) ANGEL RAIKHAN Mount Hermon Hr.Sec.School,Kohima (d) ANEIDI SANO Baptist Mission School,Jotsoma (e) ALIU T St.John's Hr.Sec. School,Tuensang (f) RAJNANDINI SAHA PranabVidyapith Hr.Sec.School,Dimapur (g)MULUNGSULA CHANGKIRI HolyCross Hr.Sec.School, Dimapur	231103133	583	AA	97.17%
	(a) LEVI VILI JOHN Northfield,Khikha (b) KEKHRESINUO SEKHOSE Mezhür Hr.Sec.School,Kohima (c) ANGEL RAIKHAN Mount Hermon Hr.Sec.School,Kohima (d) ANEIDI SANO Baptist Mission School,Jotsoma (e) ALIU T St.John's Hr.Sec. School,Tuensang (f) RAJNANDINI SAHA PranabVidyapith Hr.Sec.School,Dimapur (g)MULUNGSULA CHANGKIRI HolyCross Hr.Sec.School, Dimapur	231105320	583	AA	97.17%
	(a) LEVI VILI JOHN Northfield,Khikha (b) KEKHRESINUO SEKHOSE Mezhür Hr.Sec.School,Kohima (c) ANGEL RAIKHAN Mount Hermon Hr.Sec.School,Kohima (d) ANEIDI SANO Baptist Mission School,Jotsoma (e) ALIU T St.John's Hr.Sec. School,Tuensang (f) RAJNANDINI SAHA PranabVidyapith Hr.Sec.School,Dimapur (g)MULUNGSULA CHANGKIRI HolyCross Hr.Sec.School, Dimapur	231113094	583	AA	97.17%
	(a) LEVI VILI JOHN Northfield,Khikha (b) KEKHRESINUO SEKHOSE Mezhür Hr.Sec.School,Kohima (c) ANGEL RAIKHAN Mount Hermon Hr.Sec.School,Kohima (d) ANEIDI SANO Baptist Mission School,Jotsoma (e) ALIU T St.John's Hr.Sec. School,Tuensang (f) RAJNANDINI SAHA PranabVidyapith Hr.Sec.School,Dimapur (g)MULUNGSULA CHANGKIRI HolyCross Hr.Sec.School, Dimapur	231303102	583	AA	97.17%
	(a) LEVI VILI JOHN Northfield,Khikha (b) KEKHRESINUO SEKHOSE Mezhür Hr.Sec.School,Kohima (c) ANGEL RAIKHAN Mount Hermon Hr.Sec.School,Kohima (d) ANEIDI SANO Baptist Mission School,Jotsoma (e) ALIU T St.John's Hr.Sec. School,Tuensang (f) RAJNANDINI SAHA PranabVidyapith Hr.Sec.School,Dimapur (g)MULUNGSULA CHANGKIRI HolyCross Hr.Sec.School, Dimapur	231802070	583	AA	97.17%
	(a) LEVI VILI JOHN Northfield,Khikha (b) KEKHRESINUO SEKHOSE Mezhür Hr.Sec.School,Kohima (c) ANGEL RAIKHAN Mount Hermon Hr.Sec.School,Kohima (d) ANEIDI SANO Baptist Mission School,Jotsoma (e) ALIU T St.John's Hr.Sec. School,Tuensang (f) RAJNANDINI SAHA PranabVidyapith Hr.Sec.School,Dimapur (g)MULUNGSULA CHANGKIRI HolyCross Hr.Sec.School, Dimapur	231809183	583	AA	97.17%

Paiwang aser Kikheto nati V. Hekali Zhimomi den ajurutep

Dimapur, May 24, 2023 (TYO): Health & Family Welfare Minister P. Paiwang Konyak den Commissioner & Secretary Y. Kikheto Sema IAS nati Delhi nung Additional Secretary & Director General NACO Ministry of Health & Family Welfare V. Hekali Zhimomi den ajurutep.

Minister Paiwang aser Kikheto nati Bodbarnü Hekali Zhimomi den ajurutepdang Medical College, HIV & AIDS, Nursing College aser Tobacco Control onüktem lemsatep.

Ministry of Health & Family Welfare, GOI aser NMC ajanga NIMSR Kohima nem LOP agütsüba atema pelar aser 2023-24 nungi mezüingbuba academic session tenzüka aodang teyari maneni nüngdaksü ta Minister Paiwang-i ashi.

"Ministry-i Mon Medical College ya Centre kübok Regional Institute ka akümtsü asüingdang kechiyong Nagaland state nung National mesüra Regional indang Institute tajung ka danga mali" ta paisa ashi.

Ministry-i Nagaland nung HIV & AIDS azüokba nung teyari ajak agüja aruba atema pelar ta Kikheto-ia ashi.

"Linük nung Nagaland ya 2nd highest HIV & AIDS state lir aser onoki akokba tashi Test, Treat aser awareness campaign maneni inyaka arur. NGO aser Arogotem dena onoki iba mapa inyaker, Department-isa State GIS cell den yaritepa mozü aser osettem belentsü atema drones amshir" ta Kikheto-i metetdaksü.

(Maneni tapak 2 nung...)

HSSLC Arts Topper Kr. Moanola Longchar-i Theology zünger Tsüngrem tenzüksü



Kr. Moanola Longchar-

Mokokchung, May 24, 2023 (TYO): 2023 küm Nagaland Board of School Education (NBSE), Higher Secondary School Leaving Certificate Examination (HSSLCE) agiba nung Arts Stream nung Town Higher Secondary School nungi Kr. Moanola-i Total Marks 486 nguteta 97.20 percentage nung takok angur ajak rongnungi Top-1 jenjang ngutetogo.

Arishi kum 18 tain Kr. Moanola ya Lirmen nunger Wb.

Limawapang Longchar aser Wt. Tsupongtsungla Jamir (Changki) tena jala tantsüla aser tenu tebur ka lir.

May 24 nü NBSE result adoker kelen Mokokchung nung lar kidang osang zülurtemi la ajurua jembiba mapang nung lai la St. Joseph College Dimapur nung azüngtsü aser psychology honours agia Graduate sür kelen Theology zünger Arogo nung inyaksü mesüra missionary inyaksüta ashi.

Iba ama Top-1 jenjang nung takok angutsü yimla-a liasü asüta asüingdangba mapang nung lai bilemba jenjang nung takok mongutetra kanga jashitsü asünung kangabo yimlaa mata ashi.

Laisa January ita Model Exam agiba mapang nung kanga dang junga meranga bushir agütsü,iba sülen February ita Study break aliba mapang nung lireptsüka

bushia renema ayu, saka final tatidang agidangbo anisüngzüka dang bushi, saka la terenembaji Class 10 tatidang nung Top-11 jenjang nung 96.67 percent anguba dang nungi timba angutsü mangdang nung zünga renem ta lai la iba class-12 tatidang asoshi renemba indang asüingdang ashi.

Lai la takok tajung ngutetba asoshi mezüingbuba Tsüngrem nem tetushi agütsür aser tsürabur aser tesayur dang la takok tajung ngudaksütsü asoshi ajungshia yariba asoshi tepelaba metetdaksü.

Naga nunger kaketshirtem dang Kr. Moanola-i azüingba mapang nung Tsüngrem akhümtsüba pei takum aziüoka züngra takok tajungji ngutettsü, anungji Naga nunger kaketshirtemi ibaji angateta alitsüla ta kaketshirtem ayongzüka olen ka ashi.

DGC nung Science Stream tekeraba nung lapoktsüla: DNSU



May 9, 2023 nü DNSU ketdangpur temi Minister, Higher Education & Tourism, Temjen Imna Along den ajurutebpa noksa nung angur.

Dimapur, Monupii/May 24 (TYO): Dimapur Naga Students' Union (DNSU) ketdangpur temi May 9, 2023 nü Minister, Higher Education & Tourism, Government of Nagaland, Temjen Imna Along den par kidang senden ka mena Dimapur Government College nung Science Block dak sendakba nung Commissioner and Secretary, Higher Education, Govt. of Nagaland dangi züluba shiti ka agüja liasü.

semzükba Science Block tang tashi inyakyim tenzüksü asoshi state sorkar aser Department ajanga mapa meinyaktetba indang liasü. Kaketshir aika Science Stream nung azüngtsü tejangraba liaka state nung aliba college tem nung Science Departments indang menden tatakük dang aliba ajanga kaketshir danga state nung azüngtsüsa akumer aser ibaji ajanga kaketshir lenmang aisü nung timtem ajurur, ta Union ajanga ashi.

ajanga taruba academic session nungi Science Block tenzüksü/ lapoktsü telangzüba tajung agütsüba asoshi pelaba lemsateper aser state sorkar aser department ajanga Dimapur Government College nung Science Block memonui lapoktsü asoshi mera agütsü imlar, ta DNSU ajanga ashi. Kasa mapang Union ajanga Commissioner & Secretary, Higher Education Govt. of Nagaland ajurua kasa tebilemtsü indang lemsateper aser tezüluba nung agüja liasü.

DGC nung Yuva Tourism Club tenzükogo



Dimapur, Monupii/May 24 (TYO): Dimapur Government College ung Yuva Tourism Club tenzükba sentong ka May 24, 2023 nü Seminal Hall, DGC nung agia liasü. Iba sentong nung Dr. Tamsusenla Jamir, Asst. Professor & Teacher In-Charge of the Club menden liasü aser lai tarur pela agizükba den külemi iba club nung züngsem asütsü kaketshir 112 tenüng agütsüogo ta metetdaksü aser kaketshir temi tejangraba tulu aliba atema pelaba lemsatepa liasü. Azadi Ka Amrit Mahotsav nung shilem ka ama Ministry of Tourism ajanga 'YUVA Tourism Clubs' ya tenzük aser India nung tourism tsütsü nükla aliba indang lanurtem nem angazükdaksütsü aser sobaliba tajung angateta tourism tsütsü tejangraba lidaktsütsü

nükjidong nung iba sentong tenzük, ta lai ashi. Item lanurtem ya India nung tourism ajungkettsür ka-ka asütsü aser Tourism Club nung shilem agiba ajanga teamwork, management amala soft skills angazükba nung yaritsü aser tourism atema ajungmesor alitsü. Dr Vinyuhu Lhoungu, IQAC Co-ordinator DGC ajanga iba sentong nung ashiba agi, Ministry of Tourism, Government of India, indang Kolkata nung aliba North Eastern Regional Office ajanga iba sentong ajunga ketdangtsü agütsü aser club tajungtiba nung maparen balala inyaktü asoshi nungdakba nung yaritsü. Sobaliba yimya balala aser linük indang geography lanurtem nem angatetdaksütsü aser shisaliok nung tourism indang tali

angatetdaksütsü nükjidong nung iba club ya tentet, ta pai ashi. Iba club kübok Essay writing, Logo Designing, My Shot, Quiz, Painting, Poster Designing amala sentongtem ayongzüksü, ta pai ashi. Kasa sentong nung club ketdangpurtem shima liasü. Iba club indang tir aser tongti zülur ya 4th Semester nungi shimtet, tatong tir aser repsem zülur ya 2nd Semester nungi shima liasü. College indang vice principal, Kezhaleu Hesso-i iba club semzüksü aser ketdangpur aser züngsem tem nem tenüngsang agüja liasü. Lai parnok dang Club inyakyim nung tajungtiba agi shilem agütsü aser alima nung kanga kerää ainba sector - tourism sector - nungi angazüksü ayongzüka liasü.

Ao Senden-i UPSC 2022 nung takok angur nem tenüngsang agütsü

Dimapur, Monupii/May 24 (TYO): India nung tematiba UPSC 2022 Civil Service Examination nung Nagaland nungi par pezüi takok tajung ngutetba atema Ao Senden-i tepela tulu nung tenüngsang agütsür, ta Ao Senden sangdong ka ajanga ashi. (1) Rank 203 Mr. Yimkum I Ozukum. (2) Rank 387 Ms Vevotolu Kezo, (3) Rank 723 Ms. Imkongnukla Ao, (4) Rank

874 Ms. W Aotula Ozukum Nenoki bendanga agütsür meranga inyakba ajanga Nagaland nung aliba nüburtem dangi konang tetushi bener aruja jenjang tulu ajanzüketba atema takok anguba candidates tem nem tenüngsang agütsür. Ner wadang nung takokba lidakjang aser tarutsü anogotem nenoki linük tenzükba wadang nung Tsüngremi moajang, ta sangdong ajangasa ashi.

Election mapang commercial gari amshiba atema MDCVOA-i sen meshir

Mokokchung, 24th May (TYO): 14th Nagaland Legislative Assembly Election February 2023 nungto agiogo, iba mapang Mokokchung District Commercial Vehicle Owners' Association (MDCVOA) nungi gari hire amshiba indang tangutsü tim sen koba mengui lir, ibaji gari kiburtem nem anogo 7 tsüngta agütsütsü asoshi MDCVOA

tenüng nung Truck Owner Association Mokokchung tir - Tsuktimongba, Private Bus Union Mokokchung tir - Lanuakum, Pick-up Union Mokokchung tir - Meyi aser All Nagaland Taxi Association Mokokchung Unit tir - Tongpangkokba parnokki Mokokchung DC & Returning Officer dangi yokba shiti ka nung mepishia metetdaksüogo.

Election mapang commercial gari amshiba atema MDCVOA-i sen meshir

Dimapur, Monupii/May 24 (TYO): Child Pornography atema May 18, 2023 nü Kohima nungi Cyber Crime Police Station, PHQ ajanga nisung ka apu. Iba nisungba ya "Wickr app" nung Rooms/Groups nung shilem ka liasü, kong züngsemtem rongnung child pornography inokja/lempatepa liasü. Iba ken o ya Interpol, Stockholm nungi CBI International Police Co-operation Unit (IPCU) ajanga Nagaland Police dangi yoka liasü. Electronic form nung tim masüba mesüra 'sexually explicit

material' adoktsüba mesüra belenshiba ya IT Act kübok aibelen lir, ta Nagaland Police ajanga nenshia ashi. WhatsApp ama Wickr app yagi 'end-to-end encryption' agütsür, saka Law Enforcement Agencies temi lapoka repringteter aser mapa tamajung inyakba puteter. Iba amala maksütsü mapa inyakba sexually explicit material tem social media sapang mesüra messaging apps nung lemsaba metetra police nem metetdaksü, ta nüburtem dang ayongzüka liasü.

HSLC & HSSLC tatidang nung takok angur nem tenüngsang agütsür: DNSU

Dimapur, Monupii/May 24 (TYO): Nagaland Board of School Education (NBSE) kübok High School Leaving Certificate (HSLC) aser Higher Secondary School Leaving Certificate (HSSLC) examination 2023 nung takok anguba kaketshir ajak nem nüma tanga tenüngsang agütsür, ta Dimapur Naga Students' Union (DNSU) sangdong ka ajanga ashi. Timtem balala ajuruaka nenoki tanen makai meranga inyakba aser yimya tajung ajanga nenoki iba takok ngutet ta angateta pelar aser tejak tenteter

aser asenok ajunga asoshi alima tajungba kumdaksütsü asoshi ner shisatsü amshitsü renema alitsüla, ta ashi. Tanü nenoki takok anguba ya nenoki temolung agüja meranga inyakba aser bendanga agütsür azüngba ajanga lir. Takokba jenjang tali angutsü asoshi maneni meranga inyaktü imlaa atar. Tamakok ajuruaka aliba kaketshirtem danga maneni teimla tulu nung meranga azüngtsü ayongzüker, ta DNSU sangdong ajangasa ashi.

Paiwang aser Kikheto... (TAPAK 1 NUNGI...)

Ministry-i iba innovative scheme atema drones talila alitsü atema senotsü agütsütsü mepishir. Linük nung Nagaland ya 2nd highest consumption of Tobacco lir. State sorkari tawa tu sorkar aser nija mozükitem aser school ajak Tobacco Free Zone ta sangoktsüogo, ta paisa ashi. Minister Paiwang-isa Ministry dang Dimapur, Kohima aser Mokokchung nung District Hospital nung aliba Nursing schools nungi Nursing Colleges ajungketba atema pelaba metetdaksü. Nagaland nung tawa AIDS &

HIV maparen tajung inyakba atema Hekali Zhimomi-i tenüngsang agütsü aser maneni surveillance, treatment aser preventive maparen inyaktü ayongzüker. Nagaland nung Health rejutem aser school ajak Tobacco Free Zone ta sangoktsüba atema tenüngsang agütsür aser maneni NGOs den yaritepa alizing atongtsü merangtsüla, ta Hekali-isa ashi. "Nursing Sector nung inyaka aotsü lenmang aika lir anungji tekaratiba nung Nursing college asem lapoktsü ayongzüker" ta Hekali Zhimomi-isa ashi.



Tzurangkong Kaketshir Mungdang (TKM), Jangpetkong Kaketshir Telongjem Mungdang (JKTM), Japukong Kaketshir Mungdang (JKM) aser Mangkolemba Town Students' Union (MTSU) ta MTSU conference hall nung senden ka amenba mapang tangokba noksa nung angur. Iba senden mener külen, ADC Mangkolemba, SDPO Mangkolemba, SDEO (Education Department) Mangkolemba, Community Health Centre Mangkolemba aser PWD (Road & Bridges) Mangkolemba office-tem semdanga liasü. (Mokokchung, 24th May, 2023)



Yimkum I. Ozukum



Kr.Imtjungla T Ozukum

TENÜNGSANG AGÜTSÜR

Wb.Imtilepük Ozüküm & Wt.Merainla (Mopungchuket) na jbaso Wb.Yimkum I.Ozükümi 2022 UPSC tatidang nung takok tulu ngutetba asoshi Süngratsü Ozükümer kidongi pa nem tenüngsang tulu agütsür. Ano, Rev.Dr.Temjen Ozüküm & Wt. Bendangla Longkumer (Changki) na jala Kr.Imtjungla T Ozükümi M.Sc. Gyneocology, MNR College, Hyderabad nungi top 13 jenjang nung takok tajung anguba asoshi tenüngsang tulu agütsür. Tsüngremi Süngratsü Ozüküm jala jbasotem nem takok tulu agütsüba asoshi Pa tenüng asanger. Ano, tarutsü nunga nübortem tenzükbä mapa nung Tsüngremi nenaprongla nem taküm tajung aser arishi talang moajang ta sarasademtsür.

Sd/-
(TIAMEREN OZÜKÜM)
Tazüng, Süngratsü village.

Opp. Party 19-i Parliament ki tasenba semzükbä sentong nung madentsü

New Delhi, Monupii/May 24 (Agencies): Bodhbarnü Congress, Left aser TMC densema opposition 19-i longjemer külem sangdong ka ajanga Ato kilonser, Narendra Modi-i Parliament building tasenba semzüksüba sentong nung madentsü, kechiyong iba ya linük nung tematiba Tir office mezügmeshiba lir, ta metetdaksü.

Parnoki külem sangdong ajanga, Parliament building semzükbä ya kanga tongtibang sentong ka lir, ajisüaka sorkari democracy amokmerner ta onoki bilemer aser tashi tali amshia Parliament building tasenba asü ta bilemer, ta metetdaksü.

"Ajisüaka Ato kilonseri Tir Murmu sendoker pai pasasa Parliament building semzüksü telemtetba agiba ya mezügmshiba dang masü saka asen democracy anema inyakba lir, anungji telangzüba tejangja agütsüsüla," ta külem sangdong ajanga metetdaksü.

Külem sangdong nung sign asüba opposition party temji Congress, Trinamool Congress, DMK, JD (U), AAP, CPI-M, CPI, SP, NCP, SS (UBT), RJD, IUML, JMM, NC, KC (M), RSP, VCK, MDMK aser RLD lir.

May 28, 2023 nü Ato kilonser, Modi-i Parliament building tasenba semzüksütsü.

Opposition party tem jagi, Tir ya India nung tekolak dang masü saka Parliament nung tongti, kechiyong Tiri Parliament ayongzüker, anentsür aser Parliament nung jembir, ta metetdaksü.

"Tatsüba agi, Tir medeni Parliament akatsü makok. Ajisüaka Ato kilonseri la (Murmu) medeni Parliament building tasenba semzüksü telemtetba agi. Iba ya tematiba Tir office mezügmeshiba lir aser linük temzüng alema inyakba lir," ta parnoki metetdaksü.

Parnokisa, Parliament building tasenba ya coronavirus wara aliba mapang sen aika indoka yanglu aser India nüburtem mesüra MP tem den mejembii yanglu, ta metetdaksü.

"Parliament nungi democracy tanela agienogo, anungji building tasenba nungji onoki tajung kecha mangur. Parliament building tasenba semzükbä sentong nungji madentsü onoki longjemer telemtetba agiogo," ta parnoki metetdaksü.

2020 kum December ita nung Ato kilonser Modi-i Parliament building tasenba atema

foundation lung azüngtsüba nunga opposition party tem maden.

Linük nung aluyimertemi longkak aitiba mapang, Covid-19 wara mapang aser lockdown ajanga rongsenkettsüng tsütsü timtemba mapang nung foundation lung azüngba agi parnoki iba sentong nungji maden, ta metetdaksü.

CHRISTIAN HIGHER SECONDARY SCHOOL

NYAMO LOTH ROAD, DIMAPUR - 797 112, NAGALAND



IN LOVE AND

TRUTH WE STRIVE

Congratulations

Oh give thanks to the Lord, for He is good; for His steadfast love endures forever! ~ 1 Chronicles 16:34

HSSLC / HSLC TOPPERS 2023



ZAHID AHMED LASKAR
HSSLC - 1st Rank (Com.)



FIZA KHANOM BARBHUIYA
HSSLC - 2nd Rank (Com.)



DAVID SHYAM
HSSLC - 9th Rank (Com.)



BODENO CHÜSI
HSSLC - 3rd Rank (Arts)



SANGPILA SANGTAM
HSSLC - 7th Rank (Arts)



AWANTIKA KUMARI
HSLC - 5th Rank



EPIRHONI N JAMI
HSLC - 18th Rank

SUBJECT TOPPERS (HSSLC / HSLC)



ZAHID AHMED LASKAR
B.Studies (100)
ENT (100)
FBM (100)



FIZA KHANOM BARBHUIYA
Eco. (100)
FBM (100)



PROYASH SARKAR
ENT (100)



AYUSH TUNWAL
FBM (100)



BODENO CHÜSI
History (98)



SANGPILA SANGTAM
Sociology (99)
History (98)



DAVID SHYAM
FBM (100)



DEEP CHANDA
FBM (100)



ANMOL KUMARI
FBM (100)



IMLIMENLA L JAMIR
FBM (100)



RAVI KUMAR CHAUDHARY
FBM (100)



SARIMUL HOQUE
FBM (100)



ABHIDA BEGUM TALUKDAR
FBM (100)



ALLOVI YEPTO
FBM (100)



AWANTIKA KUMARI
S/S (100)



LANUSANEN IMCHEN
S/S (100)



EPIRHONI N JAMI
S/S (100)



LIANA AYE
S/S (100)

CHSS family is truly humbled and honoured by the brilliant performances of HSLC & HSSLC students in 2023 Board Examinations. Congratulations to all our achievers, parents, teachers and staff for your tireless & selfless effort towards the students' success and the school growth. May the Almighty God continue to bless and prosper you all in all your future endeavours.

- A Felicitation Programme for the toppers and State highest mark holders will be held on May 26, 2023 at 9:00 A.M in the Covenant Hall.
- All toppers are requested to attend the function along with parents in regular school uniform.



TIR YIMYIM YIMOBILEM (EDITORIAL)

DIMAPUR YANGTEPNÜ, MONUPII (MAY) 25, 2023

Tetsürtemsa tajungba

Mapang kenpiga Nagaland nungi Naga nunger lanurtem rongnungi government mapa nung tongti ketdangser shimtsü atema Union Public Service Commission (UPSC) ajanga agiba tatidang nung takok anguba otsü mangashii aruba sülen, tang meimlaika yaküm 2022 küm agiba UPSC tatidang nung Naga nunger pezü tashi agi takok tajung anguba osang ya Naga nunger tanur tain ajak asoshi tepelatsü osang tajung ka lir. Ano, asenok asoshi talila tepelatsü osang tajung kaji, takok angur pezü rongnung asembo asen Ao kin nungi lir. Ano, asen kin nungi takok angur asem rongnungi anabo tetsür lir. Iba jagi balaka asenok tepelaji tuluba aser teperiba akümer. Aji oda, tanü asenok yimten aser loktiliba nung tetsürtem jenjang tajungba kuma anitetsü merangba mapang ka nung, Nagaland nung Naga tsürtemi state election nung aser UPSC tatidang nung takok tajung anguba yagi Nagatsürtema joko akhi sobaliba ajanga tebur kübok alitsüsa alenba nungi peisasa salaba kuli angur. Atangji, akhi putu mapang inyakba mapatem ajak temang dak aketba tashi agi onzüksüba mapatem dang liasü, anungji mapa teimbaka teburtemi dang inyaksüsa aküm. Ajsüaka, tanübo temang dak aketba tashi agi masü saka tokolok amshia machine aser computer agidang inyaker. Akhidang tsükchir den raradang nok nü amshia chitepa rara, anungji tongpang nung teburtem dang nokdak, saka tanübo raraba nok nüa temeyong agi tanemi dang anem nung injang tuguadoktsüba prangpong aser ali nung dang masü saka anüng nung tayimtsü nungi injang bomb yoka raraba putu, anungji raraba tongpang nunga tetsürtem o teburtem na kecha tebandang mali, pei tetsü tasoli atema kasasa shilem agitetter. Aji oda, terenlok mapa inyakba nunga akhidang longren nung süngzü agi temang sendaka yur jambol amshia gari lenmang atu. Tanübo lenmang atuba gari tapu balala amshia inyaker. Item ama ali mapa nung inyakyim melenshiba ajanga tanü putu nungbo ki mapa nungi shir office mapa tashi nung, ya teburtem mapa aser yabo tetsürtem mapa ta kecha tebandang mali kümogo. Iba ama putu tasenba nung alir teburtem asoshi anisüngzük tuluba kechiyong akhidang teburtemi inyakba mapatem ajak tetsürtemi inyaker aser tetsürtema inyaksangshi tesadamba kechiyong akhi putu nung ama yabo tetsüri meinyaksüla, yabo tetsür machitsüla, yabo tetsür magitsüla aser ilen jagibo tetsür meyoktsüla ta kecha mali, teburtemi inyaktetba ajak tetsürtemi inyakteter. Ibaji dang masü, mapa aika nung tang amaji teburtem dang nungibo tetsürtemi tajungba, ochitashiba aser tenendakba inyakteter. Yaküm 2022 agiba UPSC tatidang nung takok angurtem rongnung tematiba takok jenjang pezü tashibo tetsürtem lir. Atangji, takok angur 933 rongnung tebur 613 aser tetsür 320-i takok ngua lir. Anungji, tazungtsübo tebur teimba saka tagitsü nungbo tetsürtemsa tajungba. India nung UPSC tatidang ya alima nung tatidang agiba rongnung tasaktiba jenjang asemubaba nung lir. Alima nung tatidang tasaktibaji China nung College admission atema agiba tatidang 'Gaokoa' aser tanabubaji India nung Engineering azungtsü atema agiba tatidang IIT-JEE. Tetezü, India nung azungtsü asüyonga mesüra government ketdangsuba mapa nung inyaksü asoshi agütsüba tatidang asüyonga, item tatidang nung takok ngua züngtetter aser mapa angurtemji shitakba tajungsa lakh aika rongnung tajungtiba, techiratiba aser meranga inyakertem lir. Itemji meranga inyakba kija agia masü aser tokolok ajungba kija agia masü saka tokoloka tajung aser kanga meranga inyakba purtem lir. Itemji asen lima asoshi rongsen. Parnok libaliro yimyaji tongmelang asütsüa akok saka nüma reprangtsüla purtem masü. Parnok rongnung teimbaka Tsüngrem aser tsürabur akümtsüsuba jala jabasotem lir. Tanü putu nung UPSC dang masü NPSC ama tatidang nung takok angurtemji mashi masü. Parnokji tashitemeteter. Asüng asen lima ajungtsü majungtsübaji parnok ket nung lir. Atangji, tesasatsüka, yashi tashi nung government nung ketdangsertem teimbakati pei chirnurtem atema talitsü kiojen yanglutsüba dak alaka pei limabo junga meyanglutsütet tamakok nung anenogo. Item tsürabur tamakokji tanü takok angur tetsürtemi anir pei lima meimba ochi shisatsü aser mapa tajung agi nembangja inyaksütsü imlar.

OLEMSABANG

KARNATAKA NUNG CONGRESS-i TAKOK TULU ANGUBA
AJANGA NAGA NÜBURTEM ASOSHI TEIMLA ASER TARUTSÜ
INDIA LIMA JENJANG TAJUNGBA NÜKLA PENZÜ :

~ Toshiokba, Ex-MLA

Tawa Karnataka nung state Elecion agiba sülen Congress telok ajanga tanungba party neploka kokja akokba sülen India lima ajanga nung teimla aser tarutsü jenjang tajungba kuma aotsü nukla tulu ka nüburtemi ngudar. Karnataka nung Congress ajanga takok tulu angubaji Congress telok tanaben tasen kuma asensashiba ka tenzükba dang masü saka iba ajanga India lima nüburt aika nem tarutsü asoshi teimla tulu agutsüba den ano asen Naga kin asoshi kanga dang asenok ajaki menungra aser yongyaseta aliba koba dang telongjem, terenlok, tejakleni aniba telok aser ano talisa ajungjem terenlok asoshi telok ka lir iba ya tanaben tashi ita kümshiba angudang nüburttem ajak pelateper.

Congress ajanga Karnataka state nung takok tulu anguba ajanga asenoki angatetsüba kaji Congress telok yagi nüburttem asoshi aria bilemetsüba aser nüburttem lenitsü asoshi bendanga aguja tapu-tanak ajak kokteta nokdaktetta tatishitsü tulu ka asenok dang sayur. Iba telok yagi asen India lima nutsüng nübu ajak liromeden, sakü-kü, kecha nunga tebandang mali anitsü asoshi tenangzükba akidang nungi alibaji tanüa kasa tanela asenoki ajitetter. Naga nunger taginuba aser tejangraba den sakü Congress telok yagi par tangatetba-jakla liru aser mapa nung liteta sayur.

Congress putipuyang ji asenoki tatongi ajidangra, lenir takotet, bendanga aguja pei asoshi masü saka pi asoshi aliba, nüburttem ajangazüksü aser lima nüburttem terenlok asoshi dang mera agia aruba asenoki kanga dang jangja meteta lir. Congress telok yagi kodanga mitsa mainshi ser India lima nung tamangba telok jenti aliba, kin tapu aika aliba aser takar-sensaker temeyoktep aliba ajak ya lirepatsüka aser yimchi yimchung nung alitsü asoshi ajungshiba ya jangratemtsüka aser tanü asenok Northe East nung dang masü saka asen Naga lima nunga dena temeyoktep kin aliba nung Congress Party ajanga asenok ajak koda ka kuma lungjema aser putepa alitsü aji nungitba asenoki angur.

Karnataka lima nung Congress ajanga takok tulu anguba ajanga India lima ajanga anokshitsüogo aser teimla tasen state aika nem agutsüogo. Aser ya kechiba ta asütsüba ka masü saka joko mapang talangka India lima nung kin o kin na, tamangbaren nung nisung teimba aliba pur temi tangar tamangba tepsetba, tenla ki raksatsüba yamala aika lir, iba amala agi joko lakja laker tanü asen tensa nung Yimsusertemi kecha ola madokba mapang ka congress tanaben asenshia aruba ajanga India lima ajak nung tesangwa tulu ka agutsüogo. Yamaji, India lima nung na aser ni senso tajung ka ama mopongsem aser tatsüka balala nem asen taküm manishidaktsüi kobala ochi aser shir teloki nüburttem arok ajungtsü asoshi inyaker iba asoshi kanga dang shisaka mera agia shilem agitsübaji asen khuret asütsüla. Asüng asen lima ji koma alitsü ibaji tanü na aser ni ajanga yangertettsü.

India lima sorkar shimtsü asoshi 2024 küm asen meyongnem temeden agitsüba lir, anungji Naga nunger ajaki iba yabo kanga dang bilemdanga shilem agitsü ayongzüker. Nai aser ni tanü asen senti vote ka sarasadema ajenba jagi asüng asen tia, asen chirnur tia melenshitsü asütsü. Tanü ajung asa masü saka koba ajanga telongjem raksatsür aser azütokshitep aser tamangba telok dak tama-inyaksü inyaker itemji asenoki yutsüdi saka koba telok ajanga arok ajungtsü asoshi dang bilemer aser koba ajanga tarutsü India lima tejakleni anir aotsü tebilemba tulu lir itemji kanga junga shisadanga lidi. Asenok tanü Congress asoshi puküma nokdakra iba telok yagi India lima tuluba dang masü saka asen atep tonga arua asenok ajak ajangzüksüsa nokdaktsütsü.

Arungma Congress telok den teka amteper telongjem nung aruya aliba 2024 General Election yabo nokdakti. Asenok dang longjemra asen lima yanglushir rongnung na aser ni adentsü koba ajanga Naga nunger tarutsü jenjang yanglushitsü. Nai Congress telok puküma nokdakbaji tarutsü asen nüburttem asoshi nokdaker ta küli agutsürba asütsü aser koba ajanga asen lima terenlok aser yimchi yimchung dangi anitsü, tanü India lima tetsübu, ochimashi, tashiyim, külme küja nung dena azütokshidaktsüba anema ola madokba sorkar ka kübok asenok teimla samar alidang asenok dangi tesangwa tulu ka arur anungji iba ya asenok kanga kumdanga aser shisaka soiti aser tarutsü anogotem asoshi kanga shishia bilema mera agiti.

Küknalim.

**Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazünger angateta agitsü mepishir**

Myanmar nung Arogoi International agencies dang teyari meshir



Myanmar nung cyclone Mocha yipru lendong atalokba sülen Sittwe jila nung takoksa angurtemi Arogoi agütsüba teyari lemozükdang tangokba noksa nung angur.

May 24, 2023: Tawa cyclone Mocha ajanga civil war aliba Myanmar linük kongshiba sülen linük nung Arogoi international aid agencies dang teyari agüjang ta mepishir.

Catholic Karuna Pyay Director, Nereus Tun Min-i, "Onoki Caritas International densema international agency balala dang Rakhine, Chin aser Mandalay regions nung yipru ajanga kongshiba tesemtem atema teyari agüjang ta mepishio," ta metetdaksü.

Min-isa, Karuna Pyay-i Rakhine state nung yipru agi mejungi kongshiba tesemtem aser Chin state kübok Khristan nütsüng aika aliba Paletwa jila ayimjema teyari agütsüdar, ta ashi.

Pyay nung Arogoi teyari nungdakba kibongtem nungita yariang ta ashiba den külemi yipru ajanga raksatsüba Tenla kitem yanglushitsü atema teyari meshi.

United Nations-i Myanmar nung yipru ajanga ki raksatsüba ajanga takoksa angur nisung million 1.6 shi yaritsü atema dollar sen million 333 agüjang ta mepishio.

May 23 nü Geneva nungi osangbenertem den jembidang UN humanitarian coordinator for Myanmar, Ramanathan Balakrishnan-i, "Iba yipru ajanga tüzüymkümlen aliba tesemtem kanga mejungi kongshio aser tzungluruwa mongpu atongsü anasa nisung meyrjang aika talidak ki makai kümogo," ta metetdaksü.

Min-isa, "Tamangba yimsü telok kari aser temelungertem kari teyari agütsüdar. Yipru agi kongshiba tesem ajak nung ki malirtem nem tejenokdak agütsütsü aser tzu ajanga menatepba tashidak balala nokdangtsü atema onoki aritepa inyakdar," ta metetdaksü.

Rakhine nungbo Jesuits-i kilem meyrjang ka dak tema agütsüogo aser nisung kati tenla agütsüba nungi Sittwe jila nung Buddhist aser Khristan kibong 20 nem lema agütsüogo, ta putir Min-i metetdaksü.

Rakhine state nung Pyay Arogo nungi putir pezüi ketdangsüa Sittwe aser Kyauktaw jila na nung healthcare teyari agütsüogo, ta pai ashi.

Cyclone Mocha ajanga Chin state kübok Tenla kitem densema Arogo kiojen 102 shi raksatsüba den külemi ki 2,700 dak tema raksaogo.

May 14 nü iba yipru ajanga mopungji ghonda ka nung kilometer 248 tashi kera aon aser tesem aika nung tzunglu sashia arua liasü, ta May 23 nü Interim Chin National Consultative Council-i sangdong ka nung metetdaksü.

Myanmar nung National Unity sorkari, iba yipru ajanga May 18 tashi nung nisung 455

süogo, ta metetdaksü. 2021 küm February ita nung sepaitemi democratic sorkar atsüngdokba sülen nungi linük nung, talisa Chin state, Sagaing aser Magwe nung lisopur telok balalai sepai yimsüsüba anema rarar.

Tang linük nung rara aliba ajanga yipru ajanga teraksatsüba junga masadangteter, ta UN Office for Coordination of Humanitarian Affairs-i metetdaksü.

"Aid agency balalai teyari agütsütsü atema sentongbo yangludar, ajisüaka tang tashi Chin state kübok yipru agi kongshiba jila ka nung danga teyari mangu," ta Chin state nung Khristan kati metetdaksü.

Mexico nung putir ka khaset; küm 9 tsüngda linük nung putir 9 tepsetogo



Rev. Javier Garcia Villafana

Mexico City, May 24 (Agencies): Mexico kübok Michoacan state nung Khristan putir ka tepsetogo; pa densemabo tesüiba küm 9 tsüngda tang agi putir 9 buba tepseter.

Arogo kübok Catholic Multimedia Center-i, ita ka tejaklen Huandacareo nung aliba Capacho Arogo nung putir inyaksü lemozüktüsang, Rev. Javier Garcia Villafana nisung kari injang agi khasetogo, ta

metetdaksü. Michoacan state prosecutor office ajanga, putir Garcia temang nung injang zübo aika liasü aser tasümgangji gari telung ka nung angu, ta metetdaksü.

Durango state nung tongti putir, Faustino Armendariz Jimenez tepsettsü merangba atema Mexican Episcopal Conference-i aitsüba sülen anogo ka dang lirbo putir Garcia khaset.

Amongnü Durango Arogo

ANOGO ABEN TSÜNGREM DEN

Tanelaren bilemtetba

(T.ken 105:5-15)

Tanelaren anema alitsü asoshi tanelaren bilemtetbaji tongtipang lir. Tsüngremi nai kechi bilemtetdaksüner nai bilemtetter asü? "Pai inyaka akaba Pa sayatenya mapatem, Pa tesüngmangtsütem, aser Pa bang obendangba bilemtetang. Pai Pa tezüngzüktepba koba o, putu meyrirjang ka dang melaogo, aji teti bilemteta lir" (t.5-8).

Tsüngremer o tem, Pa tesüngmangtsütem aser mapatem asenoki bilemtettsüla, saka aiben asenoki amadoker. Israel nungeri Tsüngremi parnok asoshi koda mela amadoka liasü! Küm shia parnoki süia aoba benjung among, iba kuli kaji Tsüngremi parnok Ejipt alar tia nungi kümzükba bilemtettsü atema liasü. Mapa kar asenoki amadoktsüla, "tesülen aliba mapatem" (Fil. 3:13). Saka ken züluri "Pa tesüngmangtsü mapatem" bilemtettsü ashir (t.5). Nai Tsüngremer temoatsütem bilemtettar ma? Tsüngrem dang mepelatsü mesüra ain adoktsü atitangra, Pa tesüngmangtsü mapatem bilemtetang.

Tsüngremia bilemtetter: "Pai Pa tezüngzüktepba bilemtetter" (t.8). Pai Pa tezüngzüktepba nangzüka aliba ama asenok dang inyaker, ozüng nung aliba ama masü, aser Pai tezüngzüktepba Par Jabaso azü agi ajina lir.

Tatamsa, Pai Pa tenangzükbatem kodanga tamakok maludaktsür ta bilemtetang. Asenoki amadokaka, Pai bilemtetter. Tsüngremi Pa tenangzükbatem ayur. Pa temulung lemtetta lir aser kodanga meyzür.

Tsüngrem O nungi tenangzükba ka talisa tanü na tashi itdaktsütsü meshiang. Nai iba tenangzükba bilemtetang, Tsüngremi Pa tenangzükbatem temang kateta ayur ta bilemtetang.

Tenla kidang nisung tain kati putir Armendariz tepsettsü meranga liasü saka pa iba lendong nungjagi meyrirui jena otet.

Conference-i sangdong ka ajanga Garcia tepsetba tatalokba aitsü aser ketdangsertem dang aibelener aputsü takhangba agütsü.

Conference-i, "Tanü asen loktiliba tensa ya shisabulutsüa lir. Telok balala tenteter nüburtem amokmerener," ta metetdaksü.

Catholic Multimedia Center-i sangdong ka ajanga, putir Garcia, Capacho anasa gari nung aoba mapang nung khaset, ta metetdaksü.

Tesüiba küm aika Michoacan state nung temesepba mozü shibelena ayokba telok balalai timtem maneni agütsür aser state tesem aika telok balalai aziöker. State nungsa ozüng alema 'log' süng shishilembar aser ozüng alema lisem atur.

Telok balalai ozüng alema inyakba mapa sademsadema inyaksü atema osangbenertem, environmentalists aser putir aika tepsetogo.

2021 küm Michoacan nung putir kati Arogo züngsemtem dang, ozüng alema inyakertem anema sorkari kecha mesüteter,

anungji Khristantemi renema alitsüla, ta jembia liasü.

Tsüngrem O jembidang Rev. Alfredo Gallegos-i, "Temesepba mozü shibelenerntem prangpong amnr arutsü, nenok meyong kiset shiruru ayatsü, nenok kinüngtsütem aser jalatem taküm raksatsütsü aser nenoki kecha mesütettsü. Sorkari kecha mesüteter, anungji prangpong kaka alia ayutsüla," ta jembia liasü.

Arogo ka nung putir, Gallegos dang "Father Pistolas" ta ajar, kechiyong pai mapang ajak nung pistol kabo bener senzür.

Mexico nung, talisa Michoacan nung sorkari ozüng alema kecha meinyaktetba ajanga Arogoi sorkar dang kanga mepelar.

Yaküm June ita nunga Chihuahua state kübok Cerocahui nung aliba Tenla ki telung nung mozü shibelener telok ka nung leniri Jesuit putir ana tepseta liasü.

Iba tatalokba sülen Roman Catholic Mexican Council of Bishops-i yimjak nung shidi ka ajanga sorkar dang, "Linük nung security inyakyim ajanga tamakok nguogo, anungji security inyakyim melentsü mapang tongogo," ta metetdakja liasü.

**AO OSHI ANGAZÜKDAK:
TANÜ ANGAZÜKTSÜBA OJANG**



Rajang

(n) shitak main, asoajen tatsü (dwarf)

* Asen lima nungbo **rajang** nisung kangabo mangur.

Rajem

(v) angajem, apijem (comprehend)

* Tanurtemi ki mapa ajak **rajema** inyaker.

OLONG PAITEP # 6525

1					2				3
							4		
5		6			7				
8									9
							10		
				11	12				
		13							
14					15				
				16					

TIPLIN

- 1. Ojembitsü tashi - 8
- 5. Sünjang tapu ka - 5
- 7. Tekanük nung enokba - 5
- 8. Teka amtep - 5
- 12. Tzüc asendak - 5
- 14. Tsünpang tema aliba - 5
- 15. Ken atenba yimya - 5
- 16. Asangur - 8

LANGTSÜNGLEN

- 1. Tepok telung nung shilem ka - 7
- 2. Tamajung aküm - 5
- 3. Chi den külemi achiba - 3
- 4. Meimchir alimai aruba - 3
- 6. Laishiba nung ayong ka - 4
- 9. Tarutsü nukla - 7
- 10. Tamendakdak/Nükjidong - 4
- 11. Tenük-telen mejungi aküm - 5
- 13. Terok nungi adokba - 3
- 14. Meimchir telemsa - 3

OLONG PAITEP # 6524 TELANGZÜBA

TIPLIN :

- 1. Taa, 3. Teküm, 6. Aibelen, 7. Aut,
- 9. Ajizük, 10. Ojala, 11. Semer,
- 13. Sen, 15. Kioktsü, 17. Itsük,
- 18. Kar.

LANGTSÜNGLEN :

- 1. Tai, 2. Asensor, 3. Tanü, 4. Kua,
- 5. Mitsüktsü, 6. Azübenshi, 8. Lah,
- 9. Jangkok, 12. Akok, 14. Nashi,
- 16. Sür.



ALOKBA RATASETER :

Alokba : Oba ni ya kong nungi aru?
Tebu : Tebosang na, yamai ati he....nütsü küna kibong aküm, aserbo nütsü la tebok nung na tanglok, ita tuku tebok nung bener kodang nosotsü khangshi tenzük, obalai mozüki bushia or Doctor Nurse ajunga senteper naji aso ati, yamaji na arua, kechiba asüngdang?
Alokba : Oba na, asen kidangser tawa transfer arubar chirto ozü zünger ka toagi parbo Zenheboto nungi arua, Naa kong nungi aru ta asüngdangba agi, asen ya kong nungi aru ta aharba dangar.

- Lilir : WhatsApp

Happy Birthday

TENÜNG : ALISEN
 Küm : 3(Asem)
 Tasoba Anogo : 25 May 2020
 Talidak : Signal Angami , Dimapur
 Jala Alisen, küm asem (3 years) tashi arishi moatsüba asoshi tsungrem tenung asanger , Ano maneni jala taküm anema aliba den taküm tajung nung tokjang ta onok sarasadem.
 - Temeim Oba , Oja ,odi Sanen aser kinüngertem

Assam-Meghalaya CM temi mangatettep aliba tesemtem semdangtsü

Guwahati, May 24, 2023 (Agencies): May 24 nungi Guwahati state guest house nung Assam-Meghalaya arrtsü ken o jembitsü tenzükogo.

Assam aser Meghalaya chief minister nati June ita West Jaintia Hills aser Karbi Anglong nung mepetmesü aliba tesemtem semdangtsü mulungtepogo.

Tawa West Jaintia Hills aser Karbi Anglong nung Karbi aser Jaintia nunger tsüngda mepetmesü adoka raratepogo.

"Tanü nungi state anaprong nungi regional committee tem ajuruteptsü aser state ana nung

mangatettep aliba tesemtem semdangtsü" ta Assam Chief Minister Himanata Biswa Sarma-ashi.

"Temulung lemdaktsütsü atema ni aser Meghalaya Chief Minister nati Karbi Anglong aser Jaintia Hills semdangtsü" ta pai ashi.

"Iba ajanga state anaprong nung alirtemi temulung alemtsü aser Meghalaya o Assam tsüngda tesentaktep akangshitsü" ta CM Sarma-isa ashi.

Taküm July tatemlen Local Boards-i osangtem agütsütsü aser iba sülen CM level audit

senden ka amentsü.

"Tesem trok nung mangatettep aliba atema onoki mapa tenzüktsü. Onoki territorial councils dang kuli tejangja bushitsü shiogo aser parnok nungi yakta osangtem angutsü imlar" ta Meghalaya Chief Minister Conrad K Sangma-ashi.

"Onoki Survey of India dang mangatettep aliba tesem trok indang survey maneni agitsü shiogo. Assam Chief Minister aser India sorkar lenisüba kübok iba ken o angatetteptsü" ta Conrad-isa ashi.

NSA-i Dibrugarh nung Amritpal aser yaritepertem den ajurutep

Dibrugarh, May 24, 2023 (Agencies): National Security Agency (NSA) telok ka tanü Dibrugarh-i aruogo. Parnoki Amritpal Singh aser pa den yaritepertem den ajurutep.

Ita ana tejakdang apuba sülen Sikh nunger sayutsüngir Amritpal Singh aser pa den külemi yariteper nisung 9 Dibrugarh central jail nung puoka lir.

Züngsem pezü NSA telok ya NSA indang advisory board chairman justice (retired) Shabihul

Hasnain lenisüba kübok lir aser Suveer Sheokand (member), Divanshu Jain (member) aser Rakesh Agarwal (IGP, Punjab) nunger dena lir.

Mongulbar nikonkdang 3:30 ako meta parnok Dibrugarh jail tonga aru.

May 18 nü Waris Punjab De tanishir Amritpal Singh tebu Tarsem Singh aser tetsü Balwinder Kaur nati jabaso den ajurutepa liasü.

Amritpal ya April 23, 2023 nungi Dibrugarh jail nung yua lir. Advocate

Rohit Sharma aser Advocate Rajdev Singh Khalsa (ex-Punjab MP) nati par tsürabur meina aru.

Amritpal Singh dak alia Waris Punjab De züngsem 9 tashi maximum-security Dibrugarh jail nung puoka lir.

Parnok ya Papalpreet Singh, Kulwant Singh Dhaliwal, Varinder Singh Johal, Gurmeet Singh Bukkanwala, Harjit Singh, Bhagwant Singh Bajek, Basant Singh, Gurinderpal Singh aser Daljeet Singh Kalsi nunger lir.

Police aser Assam Rifles-i prangpong-injang aika apu

Imphal, May 24, 2023 (Agencies): Imphal West District Police den 22 Assam Rifles sepaitemi mita aodang prangpong-injang aika ngutetogo.

May 23 aonung 9:35 ako meta Imphal West District Police aser 22 Assam Rifles külem telok kati Kangchup Foothill nung mita

atadang Alto gari ka nung nisung asem mener aru.

Par asem ya Thangneimang Khaute Vaiphei (63), Luntinsang Chongloi (33) aser Lunsiamlen Vaiphei (19) nunger ta jangjaogo aser parnok ket nung prangpong-injang aika bona liasü.

Kangpokpi District nungi

Luntinsang Chongloi ya 10th IRB Bn nung rifleman tasen shimoker rongnung ka lir.

Police den Assam Rifles teloki gari nung 12-bore ammunition, Single & Double barrels, folding Butt Double barrel aser Rs 37,650 apu. Iba dak sendakba nung Lamshang Police Station nung ken o ka benokogo.

**GOVERNMENT OF NAGALAND
DIRECTORATE OF TECHNICAL EDUCATION
NAGALAND: KOHIMA**

NO.DTE/ESTT-2/02/2023-24/ Dated, Kohima the th May, 2023.

NOTIFICATION

The Nagaland State Entrance Examination (NSEE)-2023 appeared candidates are hereby informed to submit Self Attested HSSLC Mark Sheet to the office of the undersigned and also asked to verify their details, options exercised through the Department Website: www.dtenagaland.org.in on or before 5th June, 2023, 5pm. Necessary corrections and rectifications are allowed based on the information furnished in the NSEE-2023 application forms.

No mark sheet or rectification will be accepted or allowed after 5th June, 2023, 5 pm.

(Er.VipulhouLhoungu)
Director.

**GOVERNMENT OF NAGALAND
DIRECTORATE OF TECHNICAL EDUCATION
NAGALAND : KOHIMA - 797004**

Dt. Kohima, the th May, 2023.

NOTIFICATION

NO. DTE/ ESTT-1/ 2015: It is to notify that the National Institute of Technical Teachers' Training and Research (NITTTR) Kolkata has established an Incubation Centre for the North Eastern States of the nation with the help of Ministry of Education, Government of India. They are keen to nurture in-house talents of the Polytechnic and engineering graduates from the North Eastern states for the promotion of all forms of innovations.

Currently, NITTTR, Kolkata is searching for the potential entrepreneurs from the North Eastern States of the country. Essential qualification and experience requirement for the potential entrepreneurs is Diploma holder in any branch of Engineering/ Technology with at least five years' industrial experience or B.E./ B. Tech in any branch of Engineering/ Technology with at least three years' industrial experience. Candidate must have requisite aptitude and potentials in entrepreneurship and innovations. A consolidated stipend of rupees twenty five thousand only (H 25,000/-) per month will be offered to the selected entrepreneurs.

Interested entrepreneurs in Nagaland are requested to submit their application with all necessary documents on or before 29th May, 2023 to the office of the under signed during office hours.

(Er. VIPULHOU LHOUNGU)
Director.



DIMAPUR GOVERNMENT COLLEGE

ESTD - 1966

NAAC Accredited B+Grade

(AFFILIATED TO NAGALAND UNIVERSITY)



***IMPORTANT DATES:**

Filling up of online forms : 25th May, 2023
 Last date of submission of online forms : 30th May, 2023
 Date of Entrance Test : 8th June, 2023
 Time of Entrance Test

1. Arts	: 09:30 am to 12:30 pm
2. Commerce	: 01:00 pm to 04:00 pm

Venue of Entrance Test : Dimapur Government College

Declaration of 1st Selected List on college website : 12th June, 2023
 Admission of Selected students : 13th-17th June, 2023
 Declaration of 2nd Selected List : 20th June, 2023
 (Based on availability of seats)

FOR DETAILED INFORMATION REFER :
<https://dimapurgovtcollege.in>

ADMISSION 2023 UG PROGRAMME (ARTS & COMMERCE)

COURSES OFFERED

- BACHELOR OF ARTS (B.A.) HONOURS**
 - (i) Economics
 - (ii) Education
 - (iii) English
 - (iv) History
 - (v) Philosophy
 - (vi) Political Science
 - (vii) Sociology
- BACHELOR OF COMMERCE (B.COM.) HONOURS**

** Subject to change from time to time as per guidelines from Nagaland University*

***HELP DESK NUMBERS:**

Monday to Saturday during office hours - 10:00 am - 04:00 pm

* Admission Procedure & Entrance Test

1. ARTS : 9863332524 | 9366127445 | 9366317208
 2. COMMERCE : 9366443881

* Technical Support for Online Application : 9366493332



Ternemjem Tsürapur



Late S. Tongpang Longchar (Molungyimsen)
Asü : 24.05.2022

Na iba akümüli nungi pilar küm renteta arudang kanga rongjenseta ala-ashir. Tensa mapang ajak nung nü sensaksem ola onok narongi arudang onok nüla kümkümsir.
 Nü akhümdong milen tesangwa agi onok teti len aniangma.
 Amen

~ *Teti mamatetba nü temeim Chirnur, Semchisemnur & Kinungertem.*

Office of the
Longpa Senso Bendanglir Telongjem
 H.Q: Mokokchung

TENÜNGSANG AGÜTSÜR



Longpa Senso Bendanglir Telongjem ajanga **Kr. Aotula Ozüküm**, Mr & Mrs. T. Watimeren Ozüküm jala-i Union Public Service Commission Civil Service exam nung takok tajung ngutetba asoshi kümrem-i pelar aser la nem tetushi aser tenüngsang tulu agütsür. Tarutsü anogotem nunga Takoksang Tsüngremi nübur tenzüksü asoshi ne nem arishi aser shisa tajung talubusa moajangma.

Sd/- **S.Bendang Longkümer** President
 Sd/- **Tako Aier** Secretary

Russia arrütsü telungi aiba nung US-i tenüng magir

Moscow, Monupii/May 24 (Agencies): Russia litsü telungi aiba nungi shilem mali ta US-i ashir, koba Ukraine nungi telungpur telok aiba tamakok ajurua tembang, ta Moscow-i ashir.

Arütsü nung aliba Belgorod region tesem kar Hombarnü amak, koba Russia-i taoba küm kidanger Ukraine linük amak tenzüker arütsü alema aita amakba tesashitiba alitsü.

Mapang tatsüka lir Russia-i noksa tem lemsatepba nung US-i yangluba Humvees densema Western military vehicles yutsür aoba mesüra raksar aliba nguogo.

US-i Russia litsü telung nung amaksü majungshi, ta nenshia ashir.

State department odongtar kati social media aser danga sapang nung prokshiba noksa nung aliba ya US-i agütsüba hadir tem lir ta nangzük saka item osang nung tangbo linüki tamang makar ta ashi.

Mongulbarnü osangbener senden ka nung jembidang, "Iba rara kechi jenjang nung raratsü asoshi telemtetba agitsü Ukraine molung lir," ta Matthew Miller-i ashi.

Arütsü anasa Belgorod nung aliba yimtsüngtem nung injang khaloktsüba sülen yangji alirtem aniena liasü. Lendong agütsür nisung 70 tepsetogo aser itemji Ukraine nunger lir, ta Russia-i nenshia ashi.

Saka Kyiv-i shilem magi ta ashir aser Russia Tir Vladimir Putin anemba Russian paramilitary telok anati arütsü alema aita amakba ya par mapa ta ashi.

Gladkov-i ashiba agi, drone ajanga Graivoron district nung gas pipeline ka raksatsü aser iba yongji Bodhbarnep mi tilaka adoka liasü.

Belgorod nung lendong atalokba indang jembidang Russia indang defence ministry ajanga ashiba agi, Ukrainian nationalist formation indang unit kati par litsü amak.

Gari teraksa indang noksa ka nung "Bakhmut atema" ta Russia nunger oshi agi zülür liasü, koba Ukraine nunger yimti ka lir aser Russia-i rakzükogo ta ashir saka Kyiv-i magizüker.

Artillery aser tayimtsü amshia amakdang Ukraine nunger kiralongrar ter dak tema tepset aser tanüngba züngsemtem ya Ukraine arütsüleni meindok, ta ministry ajanga ashi.

Saka Ukraine-ibo lendong agütsür ya Russia nunger aser Liberty of Russia Legion aser Russian Volunteer Corps (RVC) ta ajaba teloktem nungi lir ta ashir.

Paramilitary telok ana nungi social media nung osang prokshiba ajanga parnok dena aliba amai angateter. Telok anaprongi Ukraine public broadcaster Suspilne dang ashiba agi, parnoki Russian Federation den arütsü nung demilitarised zone ka yanglur aser iba nungi Ukraine memaktetsü.

Russia nunger li nung teka sangshiba ajanga anüolen linük temi tentetba NATO military alliance lenirtem temolung animesüngzük, kechiaser iba yagi Kyiv asoshi tajunga lir aser tamajunga lir.

Arütsü alema aiba ya Moscow asoshi maksü amai lir aser Ukraine south tsütsü nungi Russian sepaitem aridoktsü nükjidong nung meyipar raratsü lia operation yanglushiba nung shilem ka amai lir.

Saka ibai anüolen linük temi pelashishia magizüksü.

Item linük temi agütsüba 'long-range weapons' tem ya Russia litsü nung aliba targets tem nung mamshitsü ta nangzük lir, aser tang tashi yamajibo meinyak.

Kyiv ketdangstür temi shilem magi ta shiaka Ukraine mitkar indang itdangiterba teyari medeni amak ta amangtsü tasak lir.

Imran Khan'er party nokdangtsü asadangdar: Defence minister

Islamabad, Monupii/May 24 (Agencies): State anem inyaksangshiba sülen Pakistan-i Imran Khan-i aniba party nem tenokdangba agütsütsü asoshi asadangdar, ta defence minister-i ashi. Iba telemtetba agiba ajanga pa pusemertem tali rongmesodaktsütsü aser pa military den mangatetep aliba tamajungba kümdaktsütsü akok.

Khan ya tang civilian yimden yimsüsürtem aser tashi tait military na küm aika mangatetepi aruba nung densema lir. Pakistan puti otsü nung military-i linük ya mapang talangka yimsüsüa aruogo aser iba den parnoki sorkar ajak azioka arudar.

Iba mangatetep adokba sülen Khan pusemertem linük ajunga nung longkak aita arudar aser iba ajanga linük tamendakdak anokshitsütsü ta tsübua bilemer, kechiyong Pakistan tang rongsenketzung kanga mejungi kümer lir.

Defence Minister Khawaja Asif-i Bodhbarnü osangbenertem dang ashiba agi, Khan-i aniba Pakistan Tehreek-e-Insaf (PTI) party-i state tamendakdak makogo, koba agizüksü makoktsü.

"PTI nem tenokdangba agütsütsü asoshi asadangdar," ta pai ashiba den party nem tenokdangba agütsütsü asoshi sorkar telemtetba ka atema parliament-i tatembangbuba telemtetba ka agütsütsü nüngdaker, ta shisem.

Minister yagi, Khan pusemertem iba ita army headquarters densema military installation tem aser sorkar kitem amakba indang ateshia jembia liasü. Khan ya 2018 küm military-i teyari agüja Ato Kilonser aküm, ajisüaka telok anapronglai iba ya magizüki liasü.

Ajisüaka security dak sendakba nung tongtibang onüktem nung jushitsü merangba sülen Khan aser general tem tsüngda mangatetep adok aser pa 2022 küm PM mapa nungi agina liasü.

PM mapa nungi aginba sülen Khan-i general election takaratiba nung agitsü khanga linük kübok tesem balala nung rally ayongzuka arudar, ajisüaka PM Shehbaz Sharif shibai pa melena liasü, pai taküm October ita agitsü aliba election ya takaraba agitsü asoshi memulungi arudar.

Kasa mapang nung Khan ochi mashi ken o aika nung aija lir, koba pai magizüker aser pa election agitsü aliba küm politics nungi agintsü asoshi merangba tasa ka ta ashir.

Ochi mashi ken o dak sendakba nung Khan May 9 nü apu aser iba sülen linük ajunga nung mepetmesü tulu adok aser pa pusemertem military facility tem maka liasü. Pa apuba sülen tangbo bail nung chiokogo.

Anti-corruption agency nungi bushisüngdangertem i Mongolbarnü pa dang ghonda asem shi tasüngdangba balala asüngdanga liasü.

Senior men's Inter-district asayamung osang



Dimapur, Monupii/May 24 (TYO): Senior men's Inter-District asayamung tenzükter tasembuba anogo Nagaland Cricket Stadium nung mezüngbuba asaya Tseminyu aser Zunheboto na asayaogo.

Mezüng batting amenba sülen Zunheboto team-i over 30 nung run 143 yanglua liasü. Asaya nung Thejasilie aser Hauto nati run 19 aser 22 yanglu ajüsüaka Kavi Yeptho-i out mesüi run 44 yangluba ajanga team nem teyari tulu agüja liasü. Tseminyu atema Nuntilo-i wicket 3, Monu-i wicket 2 aser Ntsenlo aser Henry Kent nati wicket kaka agia liasü.

Asaya tanabuba shilem nung Tseminyu team-i kanga junga asaya tenzük aser opener ana senteper run 55 yanglua liasü. Parnok rongnungi Alok Sharma-i run 53 aser Potouzo Kent-i run 13 yanglua liasü. Tseminyu team-i asaya ayong ayonga akoktsü ama bilema aliba mapang Kavi Yeps-i over 4 nung wicket 5 agi aser captain Hopito Assumi-i wicket 3 agia Tseminyu team nungi batter tem kanga atonga out sütsü. Run arishiba mapang Monu Kumar-i tongtibang run 22 yanglu ajüsüaka Henry Kent-i out mesüi run 21 aser Shasinlo Kent-ia out mesüi run 9 yangluba ajanga par team-i over 25.4 nung wicket

ana agi asaya koka liasü.

Iba asaya atema man of the match naroküm Monu Kumar nem agütsü.

NCS nung tanabuba asaya nung toss akokba sülen Mokokchung team-i mezüng batting amentsü shim aser parnoki run 225 yanglua liasü. Mokokchung team nungi Captain Vijay Rai-i run 85, Champo-i run 51, Nripen Rai-i run 32, Nihal Rai-i run 15 aser Menchet Pongen-i run 11 yanglua liasü. Phek team bowler tem rongnungi Viza-i wicket 2 aser Suzuto o Porato nati wicket kaka agia liasü.

Asaya akoktsü atema run 226 yanglutsü nüngdaka asaya

tanabuba shilem tenzükba sülen Phek team nungi batsman temi pressure makok aser over 13.5 nung run 34 dang yanglur asayar ajak out süadok. Mokokchung team atema Longsasunep-i over 3.5 nung run 10 agütsür wicket 6 agi aser pa den yarisema Odilemba Kichu, Temsulong, Basant aser Nihal Rai nungeri wicket kaka agia liasü. Iba asaya ya Mokokchung team-i run 192 agi koka liasü.

Asaya nung man of the match naroküm Longsasunep nem agütsü.

Kasa mapang nung Bodhbarnü Sovima Cricket Ground nung Kohima aser Mon na asaya liasü.

Mezüng bat amenba sülen Kohima team-i asayar pongu out ser run 203 yanglua liasü. Parnok rongnungi Imomenba-i ball 81 nung run 97 yanglu aser ano Hikato-i run 13 aser Zipa-i run 65 yanglua liasü. Mon bowler tem rongnungi Shamwang Wangnao-i wicket 3 agi aser Phaknyu Konyak aser Pangnyei nati wicket kaka agia liasü.

Run arishiba mapang Mon team nungi asayar Shamwang Wangnao (run 24) aser Ahon Konyak (run 17) nati kanga süngjema asaya tenzük ajüsüaka tena out asüba sülen Mon team nungi batsman tem kanga kar out süatok aser parnoki over 18.4 nung run 65 dang yangluteta liasü.

Kohima team atema Sepichem aser Kelhousilie nati wicket pezüzü agi aser Samuel Zaputou-i wicket 2 agia liasü. Iba asaya ya Kohima team-i run 139 agi koka liasü.

Asaya atema man of the match naroküm Imomenba Walling nem agütsü.

May 25 nü asayatem:

Nagaland Cricket Stadium
8:00 ako: Niuland vs Phek
12:30 ako: Longleng vs Kohima
Sovima Cricket Ground
8:00 ako: Wokha vs Mon
12:30 ako: Dimapur vs Tseminyu.

Season tembangba sülen Jordi Alba-i Barcelona toktsütsü

Monupii/May 24, 2023 (Agencies): Küm 11 sülen tang asaya aliba season tembangba sülen Jordi Alba-i Barcelona toktsütsü, ta club sangdong ka ajanga Bodhbarnü metetdaksü.

"2023-24 season tembangba sülen pilatsü asoshi Barcelona aser Alba nati mulungtepogo," ta Barcelona-i sangdong ka ajanga metetdaksü.

"Barcelona-i Jordi Alba dang pa professionalism, bendanga agüja asayaba aser teti club asoshi tajungdang bilema inyakba atema pa dang kanga pelar," ta kasa sangdong ajangsa metetdaksü.

Alba ya 2012 küm Valencia nungi Barcelona nung arua aden

aser iba club nungi asayaba mapang pai takok marok 19 akokba rongnung La Liga title trok aser Champions League ka akokba densema lir.

Arishi küm 34 tain Spain nunger left-back asayar ya iba season nung Alejandro Balde aruba ajanga masayashi-i liasü.

Club den tenangzüktepba yanglur aliba ano küm ka anunga lia Alba-i club toktsütsü. Spain nung media sangdong balala ajanga ashiba agi, club rongsenketzüng mejungi aliba mapang pai club nem teyari agütsütsü asoshi sen aikabo memeshitsü.

Captain Sergio Busquets-i season tembangba sülen club toktsütsü sangdongba sülen tang

Alba-i iba telemtetba agiogo.

Tena club nungi tatembangbuba asaya Deobarnü Camp Nou nung Real Mallorca den asayatsü.

Alba-i Barcelona nungi 450 ben asayaogo aser iba mapang goal 27 idaktsüba den assist 91 süja liasü.

Kasa mapang nung pa Spain team nungi asayaba mapang pai 2012 European Championship-a koka liasü. Alba-a, Busquets aser Lionel Messi ama Saudi Arabia-i aotsü akok.

Alba ya tanur asüba mapang Barcelona indang academy nung aden aser iba sülen Cornellia aser Valencia-i ao aser euro million 14 yong Camp Nou-i meyipa aru.

PM Modi-i Khelo India University Games tenzüktsütsü

New Delhi, Monupii/May 24 (Agencies): Ato Kiloner Narendra Modi-i May 25 nü video conferencing ajanga tasembuba Khelo India University Games 2023 tenzüktsütsü.

Ato Kiloner-i linük nung saisapong terenlok asoshi rangloker inyaka arudar aser lanurtem dang asaya nung shilem agitsü asoshi ajungshia arudar. Lanur asayartem ajungkettsü atema sorkari

scheme balala tenzüktsüogo aser linük nung sports ecosystem tashitaitba kümdaktsütsü atema kanga meranga inyaka arudar. Khelo India University Games ayongzuka asayaba ya iba inyakyim nung shilem ka lir.

Taküm tasembuba Khelo India University Games ya May 25 nungi June 3 nü tashi Uttar Pradesh nung asayatsü.

Iba asayamung ya Varanasi, Gorakhpur, Lucknow aser

Gautam Buddha Nagar nung ayongzuka asayatsü. Asayamung nung university 200 dak tema nungi asayar 4750-i shilem agiba angutsü. Parnok asaya 21 nung tokteptsü.

Kasa mapang nung asayamung shibangba sentong ya Varanasi nung June 3 nü agitsü renema lir.

Asayamung atema mascot tenüng Jitu jatsüogo, koba Uttar Pradesh indang state animal Swamp Deer (Barasingha) lir.

Sindhu aser Srikanth na Malaysia Masters pre-quarterfinals-i iogo



New Delhi, Monupii/May 24 (Agencies): India nunger nungtu badminton asayar PV Sindhu aser Kidambi Srikanth nati Bodhbarnü Kuala Lumpur nung tang asaya aliba Malaysia Masters nung pei tata asaya koka pre-quarterfinals-i iogo.

Iba asayamung nung Sindhu seed trokbuba lir aser Bodhbarnü lai Denmark tsür Line Christophersen den ghonda ka ser minute ana kanga toktepa asayar asaya koka liasü.

Olympics nung medal ana tashi ngur alila yagi iba asaya 21-13, 17-21, 21-18 agi koka liasü. Sindhu-i Christophersen ya taoba mapanga pezübenbo koker liasü.

Sindhu tang world ranking nung jenjang 13buba nung lir aser la taruba asaya Japan tsür

Aya Oho den asayatsü.

Kasa mapang nung India tsür qualifiers Ashmita Chaliha aser Aakarshi Kashyap nata tetsür kija asaya nung toktep, ajüsüaka tenaprongla mezüngbuba round nung tsüka liasü.

Ashmita ya China tsür fourth-seeded asayar Yue Han-i 17-21, 7-21 agi akok aser Aakarshi-a top-seeded Japan tsür Akane Yamaguchi-i 17-21, 12-21 agi koka liasü.

Kasa asayamung tebur kija asaya nung Kidambi Srikanth-i kanga junga asaya aser pai Toma Junior Popov 21-12, 21-16 agi ayong ayonga koka liasü.

Srikanth tanabuba round-i iogo aser pa Thailand nunger asayar Kunlavut Vitidsarn den asayatsü.

BILEMDANGANG

"Nükjidong makai nemzura kanga belemtsü."